

NYUMBA YA HAKI YA ULIMWENGU

25 Machi 2023

Kwa Marafiki Waliokusanyika huko Kinshasa,
Jamhuri ya Kidemokrasia ya Congo,
kwa ajili ya Uzinduzi wa Nyumba ya Ibada

Marafiki wapendwa sana,

Mioyo yetu yenye furaha inageukia kwenu ninyi mliokusanyika katika jiji la Kinshasa kwa ajili ya tukio lenye umuhimu mkubwa katika historia ya jumuiya yenu; uzinduzi wa Nyumba ya kwanza ya Ibada nchini mwenu, Nuumba ya Ibada ya Kitaifa ya kwanza kuinuliwa katika ulimwengu wa Kibahá'í. Tunawatumia salaam za upendo na kuwatakia maadhimisho ambayo yataiunganisha pamoja mioyo na roho zenu katika kusifu na kutoa shukrani kwa ajili ya baraka takatifu iliyowakilishwa kwa ujenzi wa Nyumba hii ya Ibada katika taifa ambalo lipo katikati ya Afrika.

Jengo ambalo milango yake inafunguliwa hii leo huwakilisha asasi iliyozinduliwa na Bahá'u'lláh Mwenyewe katika Kitabu Chake Kitakatifu Kabisa. Akiwaagiza wafuasi Wake kujenga “nyumba za ibada kote kote katika kila nchi kwa jina la Yeye Ambaye ni Bwana wa dini zote”, Yeye aliwaasa kuyafanya Mahekalu haya kuwa makamilifu kadiri iwezekanavyo na, “kwa wangavu na shangwe, tukuzeni humo sifa za Bwana Wenu, Mwenye Huruma Kabisa.” Ibada hii na utukuzo wa Mungu hupata udhihirisho wake wa juu kabisa kwa tafsiri yake katika huduma yenye nguvu na isiyo na upendeleo kwa binadamu. Nyumba ya Ibada iliyoinuliwa katika mji mkuu huu wa Congo hivyo imewekwa wakfu kwa ajili ya kuunganisha ibada kwa Mungu na huduma kwa jamii ya binadamu, vyote vikiwa ni muhimu sana kwa ajili ya wongofu wa ulimwengu. Inaibuka, kwa maneno ya ‘Abdu'l-Bahá, kama “kituo cha pamoja” kwa roho zote. Ipo wazi kwa ajili ya wafuasi wa dini zote, inawawezesha wale wote wavutao manukato mazuri ya roho yake kuwa “waliunganishwa kwa upatano mmoja kwa mwingine”

Njia ambayo imefikisha jumuiya yenu kwenye hatua hii ilikuwa imewekwa kupitia kujitoa dhabihu kwa vizazi vya waumini waliojifunga kibwebwe ambao kwa miongo saba iliyopita wamefanyakazi kwa juhudi kubwa kote nchini mwenu kuwasilisha ujumbe uunganishao wa Bahá'u'lláh kutoka moyo mmoja hadi mwingine. Hivyo, imeibuka jumuiya iliyohakikishiwa kipekee katika dhima yake ya kuchangia kwenye uboreshaji wa jamii kwa kutumia kanuni za kiroho. Leo, katika vijiji vingi na ujirani katika taifa lenu lote kubwa jitihada zenye umuhimu wa maana za kiroho na kijamii zinakunjuka. Marafiki wanafungua nyumba zao kwa ajili ya vitendo vya pamoja vya ibada; wanamhusisha kila mmoja katika mazungumzo yanayoinua roho; kuangazia akili, na kuunganisha mioyo; wanajitoa dhabihu kutoa elimu ya kiroho na kimwili ya vijana kwa wazee kadhalika; wanajifunza kutumia umaizi wa kiroho pamoja na elimu ya kisayansi kukuza usitawi wa kijamii; na wanatafuta njia za kushiriki rasilimali zao katika matendo ya misaada ya kibinadamu. Wanaweka wakfu nguvu zao kujenga jumuiya ambazo kila siku inayofuata huwa udhihirisho wa kweli zaidi wa upendo wa Mungu na wa umoja wa binadamu. Kwa njia hizi, na nyingi zaidi, wanaelekeza moyo wa ibada na huduma iliyomo katika Nyumba ya Ibada na wanaweka misingi katika miji

na vijiji vya taifa lao ambapo juu yake, katika utimilifu wa muda, Nyumba za Ibada zaidi zitainuliwa.

Acha Nyumba yenu hii ya kwanza ya Ibada, iwe kioleza cha mwanga. Kuta zake ziweze kurindima kwa lahani za Maneno ya Mungu; iweze kuvutia matendo yatokanayo na imani ya kweli; iweze kutoa amani na utulivu kwa kila roho iingiayo humo; na iweze kutawanya mwanga wa furaha kuu kwa wote katika jiji zima la Kinshasa na taifa zima la Jamhuri ya Kidemokrasia ya Congo.

Imesainiwa na Nyumba ya Haki ya Ulimwengu